

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : Y.B. Puan Hajah Fuziah binti Salleh [Kuantan]

TARIKH : 13.03.2014

SOALAN :

Y.B. Puan Hajah Fuziah binti Salleh [Kuantan] minta **MENTERI PENDIDIKAN** menyatakan berkenaan bantuan khas untuk sekolah-sekolah agama rakyat. Apakah pula syarat-syarat kelayakan bagi satu-satu sekolah agama rakyat untuk mendapat bantuan khas daripada pihak Kementerian.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin terhadap kualiti pendidikan khususnya di bidang Pendidikan Islam dan kemudahan prasarana di institusi pendidikan yang menawarkan pendidikan agama Islam. Sehubungan dengan itu, sejak 2005 hingga sekarang sebanyak 204 Sekolah Agama Negeri (SAN) dan Sekolah Agama Rakyat (SAR) telah berdaftar sebagai Sekolah Agaman Bantuan Kerajaan (SABK).

Walau bagaimanapun, kebajikan murid-murid dan guru-guru yang berkhidmat di SAR tetap mendapat perhatian daripada Kerajaan. Bantuan secara *one off* sebanyak RM50 juta diberikan kepada SAR seperti yang diumumkan oleh YAB Perdana Menteri dalam pembentangan Bajet 2014. Syarat kelayakan sekolah agama rakyat untuk mendapat bantuan khas daripada pihak Kementerian:

1. Sekolah-sekolah agama yang menawarkan kurikulum agama/dini atau tafhiz;
2. Berdaftar dengan pihak berkuasa agama negeri dan mempunyai sijil pendaftaran;
3. Mempunyai Lembaga Pengelola Sekolah (LPS) dan diiktiraf oleh Pihak Berkuasa Agama Negeri; dan
4. Tidak dikelola oleh KPM atau mana-mana Kerajaan Negeri.

Namun demikian, KPM mengalu-alukan agar SAR berdaftar sebagai Sekolah agama Bantuan Kerajaan (SABK) supaya lebih banyak bantuan dapat disalurkan seperti mana yang telah dinikmati oleh 204 buah sekolah yang telah berdaftar sejak tahun 2005.

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : JAWAB LISAN

**DARIPADA : DATO' SRI LIOW TIONG LAI
[BENTONG]**

TARIKH : 13 MAC 2014

RUJUKAN : 6491

SOALAN:

Dato' Sri Liow Tiong Lai [Bentong] minta **MENTERI DALAM NEGERI** menyatakan tindakan yang diambil bagi membantu syarikat dan peniaga yang memerlukan pekerja asing beroperasi dan adakah kemasukan pekerja asing yang baru akan dibenarkan untuk semua sektor kritikal.

JAWAPAN:

Tuan Yang di-Pertua,

Kerajaan sentiasa peka terhadap keperluan syarikat dan peniaga yang memerlukan pekerja asing untuk beroperasi. Sehubungan ini, Kerajaan telah memberlakukan pengambilan pekerja asing bagi lima sektor utama yang memerlukan guna tenaga asing iaitu sektor pembinaan, perkilangan, perkhidmatan, perladangan dan juga pertanian bagi membantu syarikat dan peniaga untuk menjalankan operasi perniagaan.

Kerajaan juga telah menubuhkan Pusat Kelulusan Setempat (*One Stop Centre* – OSC) pada 1 Ogos 2005 bagi memudahkan majikan daripada pelbagai sektor membuat permohonan pengambilan pekerja asing. Permohonan majikan yang lengkap dan menepati kriteria serta syarat yang ditetapkan akan diberikan kelulusan pada hari yang sama.

Bagaimanapun, keperluan pekerja asing bagi sektor kritikal perlu dirujuk kepada Agensi Kawal Selia bagi setiap sektor selaku agensi yang bertanggungjawab dalam memantau keperluan sebenar guna tenaga kerja termasuk pekerja asing di sektor masing-masing. Sekiranya sektor kritikal tersebut adalah merupakan sektor beku dan sektor luar dasar, keperluan pekerja asing di sektor-sektor tersebut juga perlu dirujuk kepada Agensi Kawal Selia yang berkenaan.

Walaupun terdapat keperluan mendesak, syarikat dan majikan seringkali diingatkan mengenai aspek keselamatan yang perlu diberi keutamaan memandangkan kehadiran pekerja asing di negara ini akan turut memberi impak terhadap ketenteraman awam, kesihatan, sosial dan ekonomi.